

DICHA DE MARC VUILLEMOT, CÒNSOL DE LA SENHA

Dònas e messières, cars amics,

« Siguetz benvençuts a La Senha. E particuliamant dins lo quartier Berthe, lo mai vaste espaci de residèncis socialas dau departament de Var, monte rèston un pauc mès de 12000 personas.

« E es vertadierament un onor per nautrei de vos aculhir dins aqueste centre culturau Henri-Tisot, una dei darrieras realisaciens d'espacis publics qu'avèm fachas dins l'encastre d'un dei mai grands programas de renovança urbana de França.

« Es un renovelum qu'a consistat, despiei 2006 fins a-n-aquesta annada, en la demolicion de 862 lotjaments, qu'èron dins de torres vò de barras, e, segur, de la bastison d'autant, aquí e dins d'autreis caires et comunas d'alentorn, en la renovacion, notament energetica, de totei leis autrei, valènt-a-dire 2500 apartaments, e en la bastison de residèncis en accesion a la propietat, fins d'acaire la mescladissa sociala qu'avans n'i aviá quasi pas aici.

« Fuguèron tanbèn la renovança ò la creacion d'espacis publics, de carrieras, de vias pèr lei traspòrts colectius, de dralhas pèr lei biciletas, per-ansin de dubrir aqueste caire populari devers lo restant de la ciutat e la metropòla, de plaças urbanas, de jardins, d'ostaus e de luechs publics : escòlas, centres culturaus e sociò-educatius, estadis e espacis desportius.

« Vesètz qu'aquí – come outra-part – se pòu parlar d'urbanisme, de desvolopament social e economic dei caires popularis e, mai largament, de politica publica, en emplegant la lenga regionala.

« Es per nautrei mai que mai important, dins una comuna que seis estajans, despiei totjorn, e subretot lo mitan dau sègle 19^{ènc}, ambé lo desvolopament de la construccion navala, son venguts de totei leis endrechs de l'Euròpa e dau monde, e, bessai mai qu'en d'autrei luechs, avèm besonh, sensa estre languissós, nimai folclorics ò en replec idèntitari, d'aguer quaucarèn de se partejar. A passat-temps, lo parlar d'aici a agut aquèu ròtle.

« Es pr'aquò qu'assajam de lo faire viure dins la vida vidanta. Segur qu'aculhissèm leis associaciens de mantenènça e de promovènça de la lenga e la cultura provençalas e occitanas dins d'ostaus comunaus, de quaus nòstre ostau dau patrimòni, onte li dònem de cors de lenga, onte li fan de creaciens de musica, de dança ò de tiatre, e que sostenèm de temps festivaliers coma nòstrei fèstas calendas ò de rescòntres musicaus, encoraus e coregrafics, organizats per d'associaciens localas dinamicas : lo *Pitchòt tiatre dau Mai*, lei *Cigalons senhenc*, e encara nòstre *Cèucle occitan dau pais de Senha*.

« Mai assajam tanbèn de donar a legir la lenga provençala occitana dins la ciutat e la vida quotidiana.

« I a ansin, per eisemple, cada mes, una paja en lenga d'òc dins lo magazine municipau. Nòstrei mediatècas son abonadas a d'unei publicaciens en escritura mistralenca ò en grafia classica. Avèm estalat de panèus bilengues de signaletica urbana pèr lei noms de carrieras

dau vièlh centre de la ciutat, aqueleis dei caires de la vila, e, de segur, ais entradas de La Senha. E leis informacions utilas de la vida vidanta son escrichas en bilengue sur les panèus lumenós que si trobon de pertot dins tota la vila. Auriam vogut n'en faire mai e mielhs, e avèm demandat pèr aquò una pichòta ajuda financièra au Consèu regionau, que son capolier a pasmens desenhat despiei 2015 un vici-presidènt encargat dei tradicions e de l'identitat regionalas, mai avèm jamai obtengut de respònsa...

« Bessai qu'aquò auriá pogut atalentar a quauquei joines d'aprendre a parlar lo provençau, que, malurosament, n'i a pas gaire encò nòstre. I a plus nimai d'ensenhament de la lenga d'òc despuei d'annadas dins nòstres escòlas, collègis e licèus senhencs, mau-grat lo fach que lo Rectorat èra d'acòrdi, fa d'aquò 3 ò 4 ans, pèr donar d'oras a-n-un professor tolonenc. E ara, ambé la refòrma dau licèu, crèsi que sarà fòrça mau-eisat d'obtenir quicòm. Crèsi que faudriá luchar. E siguetz assegurats que serem ambé vautreï se decidatz d'agir vers aquest objectiu.

« Vaquí. Tot aquò es pas grand causa, mais cresètz bèn que fasèm çò que podèm. Es bessai pr'aquò qu'avètz chausit La Senha pèr vòstre recampada dau *Forum d'Òc* d'aquesta Region que, nautreï, li dison ni "*PACA*", nimai "*Sud*", mai naturalamènt... *Provènça*. E vos gramacejam pèr vòstra fisança.

« Pòdi pas demorar ambé vosautreï, que i a une bèla vida associativa au nòstre, amb'un molon d'acampadas, monte mi dèvi d'èstre. Mi desexcusaretz assegurament.

« Mai siatz aquí au vòstre. Bòna jornada. Bònas charadissas. Bòn trabalh. E gramaci, verament, a tóteï, pèr vòstre engajament encarat pèr la lenga e la cultura d'aicì. »